

Opis Dženneta

[Bosanski – Bosnian – بوسني]

Muhammed b. Ibrahim et-Tuvejdžiri

Prijevod:

Senad Muhić

Revizija:

Ersan Grahovac

2014 - 1435

IslamHouse.com

﴿صفة الجنة﴾

« باللغة البوسنية »

محمد بن إبراهيم التويجري

ترجمة:

سناد موهيتش

مراجعة:

أرسان غراهوفاتس

2014 - 1435

IslamHouse.com

Opis Dženneta

Džennet je boravište u kojem vlada mir i sigurnost i on je pripremljen samo za vjernike i vjernice.

Spomenućemo opis Dženneta onako kako je to opisao u Kur'anu Onaj Koji ga je, zajedno sa njegovim blagodatima stvorio, a također ćemo spomenuti njegov opis od strane Poslanika, sallallahu alejhi ve sellem, koji je njime kročio.

U narednim crtama slijedi detaljni opis Dženneta u svjetlu Kur'ana i hadisa Poslanika, sallallahu alejhi ve sellem.

Najpoznatija imena Dženneta

1. El-Džennetu

Ovo ime se spominje u kur'anskom ajetu: ***To su Allahovi propisi. Onoga ko se pokorava Allahu i Poslaniku Njegovu – On će uvesti u džennetske bašče, kroz koje rijeke teku, u kojima će vječno ostati, i to je uspjeh veliki.*** (En-Nisa, 13.)

2. Džennatu-l-Firdevs (bašče Firdevsa, najuzvišenijeg dijela Dženneta)

Onima koji budu vjerovali i dobra djela činili – bašče Firdeusa će prebivalište biti. (El-Kehf, 107.)

3. Džennatu 'adn (edenski vrtovi)

Ovo je lijep spomen! A one koji se grijeha budu klonili čeka divno prebivalište: edenski vrtovi, čije će kapije biti za njih otvorene. (Sad, 49-50.)

4. Džennetu-l-huld (bašča vječnosti)

Reci: Da li je bolje to ili vječni Džennet (džennetul-huld) koji je obećan onima koji se budu Allaha bojali. On će im nagrada i prebivalište biti. (El-Furkan, 15.)

5. Džennatun-ne'im (bašče uživanja)

One koji budu vjerovali i dobra djela činili, doista čekaju bašče uživanja. (Lukman, 8)

6. Džennatu-l-me'va

Zar da vjerniku bude isto kao grješniku? Ne, njima neće biti isto: one koji su vjerovali i dobra djela činili čekaju džennetske bašče u kojima će boraviti (džennatul-me'va), kao nagrada za ono što su radili. (Es-Sedžda, 18-19)

7. Daru-s-selam (Kuća blagostanja)

Njih čeka Kuća blagostanja u Gospodara njihova; On će biti zaštitinik njihov zbog onoga što su činili. (El-En'am, 127.)

Mjesto na kojem se nalazi Džennet

Uzvišeni Allah veli:

1. *A na nebu je opskrba vaša i ono što vam se obećava.* (Ez-Zarijat, 22.)

2. *On Ga je i drugi put vidio, kod Sidretu-l-muntehaa, kod kojeg je džennetsko prebivalište.* (En-Nedžm, 13-15.)

3. Ebu Hurejre prenosi da je Poslanik, sallallahu alejhi ve sellem, kazao: „Allah se obavezao da će uvesti u Džennet svakoga ko bude vjerovao u Allaha i Njegova Poslanika, namaz obavljao i ramazan postio, bez obzira da li se iselio (učinio hidžru) na Allahovom putu ili ostao u svom rodnom mjestu. Upitaše: 'O Allahov Poslaniče, hoćemo li obavijestiti ljude o tome?' Poslanik reče: 'Džennet ima stotinu deredža (stepeni) koje je Allah pripremio za borce na Allahovom putu, a razdaljina između svake deredže je koliko između nebesa i Zemlje. Kada budete Allaha molili da vam podari Džennet, molite ga za Firdevs, jer je on centralni i najviši dio Dženneta. Iznad njega je prijestolje Milostivog i tu izviru džennetske rijeke.'¹

4. Ebu Hurejre prenosi da je Poslanik, sallallahu alejhi ve sellem, kazao: „Kada vjernik odlazi sa ovog svijeta, dođu mu meleki milosti i dušu mu umotaju u bijelu svilenu tkaninu, pa je odnesu do nebeskih vrata i kažu: 'Ljepšeg mirisa od ovog nismo osjetili...'²

¹ Bilježi Buharija, br. 7323.

² Hadis je ispravan, a bilježi ga Hakim, br. 1304., i Ibn Hibban, br. 3013.

Nazivi džennetskih vrata

Ebu Hurejre prenosi da je Poslanik, sallallahu alejhi ve sellem, kazao: „**Ko (od jedne vrste imovine) podijeli dva komada na Allahovu putu bit će pozvan u Džennetu: 'O robe Allahov, evo tvoga dobra!' Ko bude od onih koji su redovno namaz obavljali bit će pozvan na kapiju namaza; ko bude od onih koji su se borili na Allahovu Putu, bit će pozvan na kapiju džihada; ko bude od onih koji su redovno postili, bit će pozvan na kapiju posta, Er-Rejjan; ko bude od onih koji su dijelili zekjat, bit će pozvan na kapiju zekata (milostinje). Ebu Bekr će na to: 'Ti si mi umjesto oca i majke, (Allahov Poslaniče), onaj koji bude pozvan na bilo koju od tih kapija nije u potrebi (da bude pozvan sa ostalih kapija), pa da li će biti onih koji će biti pozvani na sve kapije?' On reče: 'Hoće, i ja želim da ti budeš jedan od njih.'**“³

Širina džennetskih vrata

Ebu Hurejre prenosi da je Poslanik, sallallahu alejhi ve sellem, kazao: „**Razdaljina između dva kraja džennetskih vrata je kao razdaljina između Mekke i Hadžera ili između Mekke i Busre**“^{4,5}

³ Bilježe Buharija, br. 1987., i ovo je njegova verzija, i Muslim, br. 1027.

⁴ Tj. oko 1200 km. (op. rev.)

'Utbe b. Gazvan veli: „**Spomenuto nam je da je razdaljina između dva kraja džennetskih vrata onolika koliko se pređe za četrdeset godina. Sigurno će doći dan kada će na tim vratima biti velika gužva.**“⁶

Broj džennetskih vrata

Allah Uzvišeni kaže: *Ovo je lijep spomen! A one koji se grijeha budu klonili čeka divno prebivalište: edenski vrtovi, čije će kapije biti za njih otvorene.* (Sad, 49-50.)

I kaže: *A oni koji su se Gospodara svoga bojali u povorkama će u Džennet biti povedeni, i kad do njega dođu - a kapije njegove već širom otvorene – čuvari njegovi će im reći: Mir vama, od grijeha ste čisti, zato uđite u nj, u njemu ćete vječno boraviti!* (Ez-Zumer, 73.)

Sehl b. S'ad prenosi da je Poslanik, sallallahu alejhi ve sellem, kazao: „**Džennet ima osam vrata, od kojih se jedna zovu Er-Rejjan i na njih neće niko osim postača ulaziti.**“⁷

Vrijeme na dunjaluku u kojem se otvaraju vrata Dženneta

⁵ Bilježe Buharija, br. 4712., i Muslim, br. 194., i ovo je njegova verzija.

⁶ Bilježi Muslim, br. 2967.

⁷ Bilježe Buharija, br. 3257., i ovo je njegova verzija, i Muslim, br. 1152.

Ebu Hurejre prenosi da je Poslanik, sallallahu alejhi ve sellem, kazao: „**Svskog ponedjeljka i četvrtka se otvaraju džennetske kapije i opraštaju grijesi robovima koji nisu Allahu pripisivali druga, osim onima koji su međusobno zavađeni. Bit će rečeno: 'Ove izdvojite! Njima neće biti oprošteno dok se ne izmire!**'“⁸

Ebu Hurejre prenosi da je Poslanik, sallallahu alejhi ve sellem, kazao: „**Kada nastupi ramazan, vrata Dženneta se otvore, dok se vrata Džehennema zatvore, a šejtani budu povezani.**“⁹

Omer b. El-Hattab prenosi da je Poslanik, sallallahu alejhi ve sellem, kazao: „**Kada god neko od vas temeljito uzme abdest, a onda kaže: 'Ešhedu en la ilahe illallah vahdehu la šerike leh, ve ešhedu enne Muhammeden abduhu ve resuluhu/Svjedočim da nema drugog boga osim Allaha, Jedinog. On nema sudruga. I svjedočim da je Muhammed Njegov rob i Njegov poslanik.'** – biće mu otvoreno svih osam džennetskih kapija i moći će ući na koju želi.“¹⁰

Prva osoba koja će ući u Džennet

Enes prenosi da je Poslanik, sallallahu alejhi ve sellem, kazao: „**Doći ću na Sudnjem danu do**

⁸ Bilježi Muslim, br. 2565.

⁹ Bilježe Buharija, br. 3277., i ovo je njegova verzija, i Muslim, br. 1079.

¹⁰ Bilježi Muslim, br. 234.

džennetskih vrata i zatražiti da se otvore. Čuvar Dženneta će upitati: 'Ko si ti?' Odgovoriću: 'Muhammed!' On će kazati: 'Naređeno mi je da ih prije tebe nikome ne otvaram.'¹¹

Prva zajednica koja će ući u Džennet

Ebu Hurejre prenosi da je Poslanik, sallallahu alejhi ve sellem, kazao: „**Mi smo posljednji, ali ćemo na Sudnjem danu biti prvi i niko prije nas neće ući u Džennet.**“¹²

Osobine prve skupine koja će ući u Džennet

Ebu Hurejre prenosi da je Poslanik, sallallahu alejhi ve sellem, kazao: „**Prva skupina koja će ući u Džennet biće (blistavi) poput punog Mjeseca. Oni koji budu ulazili iza njih blistaće poput najsjajnije zvijezde na nebu. U njemu neće ni malu ni veliku nuždu obavljati, niti se useknjivati niti pljuvati. Češljevi će im biti od zlata, a znoj će im mirisati poput mošusa. Mengele će im biti od alojeva drveta. Žene će im biti hurije lijepih očiju. Biće svi u liku njihovog oca Adema, šezdeset lakata visokog od zemlje.**“¹³

¹¹ Bilježi Muslim, br. 197.

¹² Bilježe Buharija, br. 876., i Muslim, br. 855., i ovo je njegova verzija.

¹³ Bilježe Buharija, br. 3327., i ovo je njegova verzija, i Muslim, br. 2834.

Sehl b. S'ad prenosi da je Allahov poslanik, sallallahu alejhi ve sellem, rekao: „**U Džennet će, sigurno, ući sedamdeset hiljada, ili sedam stotina hiljada sljedbenika moga ummeta, držeći se jedni za druge, a prvi neće ući dok i posljednji ne uđu. Lica će im blještati od sjaja, poput punog Mjeseca.**“¹⁴

Abdullah b. 'Amr prenosi da je Poslanik, sallallahu alejhi ve sellem, rekao: „**Siromašni muhadžiri će ući u Džennet prije bogatih za četrdeset godina.**“¹⁵

Koliko će godina imati stanovnici Dženneta?

Mu'az b. Džebel prenosi da je Poslanik, sallallahu alejhi ve sellem, kazao: „**Stanovnici Dženneta će svi do jednog ući u Džennet golobradi, surmom podvučenih očiju, imat će trideset ili trideset i tri godine.**”¹⁶

Izgled lica džennetlija

Allah Uzvišeni veli:

1. Dobri će, zaista, u nasladama boraviti, sa divana gledati, na licima njihovim prepoznaćeš radost sretna života. (El-Mutaffifun, 23-24.)

¹⁴ Bilježe Buharija, br. 6543., i Muslim, br. 219., i ovo je njegova verzija.

¹⁵ Bilježi Muslim, br. 2979.

¹⁶ Hadis je dobar, a bilježe ga Ahmed, br. 7920., i Tirmizi, br. 2545., i ovo je njegova verzija.

2. *Toga dana će neka lica blistava biti, u Gospodara svoga će gledati.* (El-Kijame, 22-23.)

3. *Neka lica toga dana biće radosna, trudom svojim zadovoljna – u Džennetu izvanrednome.* (El-Gašije, 8-10.)

4. *Neka lica biće toga Dana blistava, nasmijana, radosna.* (Abese, 38-39.)

5. *A onih u kojih lica budu bijela biće u Allahovoj milosti, u njoj će vječno ostati.* (Alu Imran, 108.)

6. *I njih će Allah strahote toga Dana sačuvati i blaženstvo i radost im darovati.* (El-Insan, 11.)

Ebu Hurejre prenosi da je Poslanik, sallallahu alejhi ve sellem, kazao: „Prva skupina koja će ući u Džennet biće poput Mjeseca u noći uštapa. Oni koji budu ulazili iza njih blistaće poput najsjajnije zvijezde na nebu. Srca će im biti poput srca jednog čovjeka i među njima neće biti mržnje niti zavisti.“¹⁷

Način na koji će džennetlije biti dočekani

O tome Uzvišeni Allah kaže:

1. *A oni koji su se Gospodara svoga bojali u povorkama će u Džennet biti povedeni, i kad do njega dođu – a kapije njegove već širom otvorene - čuvari*

¹⁷ Bilježe Buharija, br. 3254., i ovo je njegova verzija, i Muslim, br. 2834.

njegovi će im reći: Mir vama, od grijeha ste čisti, zato uđite u nj, u njemu ćete vječno boraviti! (Ez-Zumer, 73.)

2. *I meleki će im ulaziti na svaka vrata: „Mir neka je vama, zato što ste trpjeli, a divno li je najljepše prebivalište!“* (Er-R'ad, 23-24.)

3. *Neće ih brinuti najveći užas, nego će ih meleki dočekivati: „Evo ovo je vaš dan, vama obećan!“* (El-Enbija, 103.)

Ko će ući u Džennet bez polaganja računa i prethodne kazne?

Ibn Abbas prenosi da je Poslanik, sallallahu alejhi ve sellem, kazao: „**Predočeni su mi narodi pa sam vidio poslanika i sa njim cijeli narod i vidio sam poslanika i sa njim grupu ljudi i poslanika, a sa njim deset osoba i poslanika, a sa njim peterica i poslanika sa kojim je bila samo jedna osoba. Zatim mi bi predočena brojna skupina, pa upitah: 'O Džibrile, je li ovo moj ummet?' Tad mi bi rečeno: Ne, ali pogledaj na drugu stranu.' Pogledah i vidjeh ogromnu skupinu, pa mi bi rečeno: 'Ovo je tvoj ummet i sa njima sedamdeset hiljada, koji će ući u Džennet bez polaganja računa i bez prethodne kazne.' Upitah: 'A zbog čega?' Dobih odgovor: 'Oni se za vrijeme života nisu kauterizirali,¹⁸ nisu tražili da im neko drugi uči Kur'an (rukju) i nisu sujevajerno**

¹⁸ Spaljivanje rane radi sprečavanja daljnjeg procesa, otvaranje rane pomoću izjedajućih hemijskih sredstava, usijane kovine ili iskri električne struje visokog napona.

vjerovali u loše predznake, nego su se samo u Allaha pouzdali.¹⁹

Ebu Umame prenosi da je Poslanik, sallallahu alejhi ve sellem, kazao: „**Gospodar moj mi je obećao da će od mojih sljedbenika bez polaganja računa i bez kazne ući u Džennet sedamdeset hiljada ljudi i uz svaku hiljadu još sedamdeset hiljada i plus tri pregršti moga Gospodara.**“²⁰

Opis zemlje i građevina Dženneta

Enes prenosi da je Poslanik, sallallahu alejhi ve sellem, u hadisu koji govore o mi'radžu, kazao: „**Zatim me odveo do Sidretu-l-muntehaa kojeg su prekrile boje, a da i sam nisam znao koje, da bi zatim bio uveden u Džennet, u kome su bile ogrlice i đerdani od bisera, a zemlja od miska.**“²¹

Ebu Hurejre prenosi da je Poslanik, sallallahu alejhi ve sellem, kazao: „**Cigle džennetskih građevina su od zlata i srebra, malter je od miska, pijesak je od bisera i safira, a zemlja mu je od šafrana. Ko uđe u Džennet uživati će i nikada neće biti nesretan, vječno**

¹⁹ Bilježe Buharija, br. 6541., i ovo je njegova verzija, i Muslim, br. 220.

²⁰ Hadis je ispravan, a bilježe ga Tirmizi, br. 2437., i Ibn Madže, br. 4286., i ovo je njegova verzija.

²¹ Bilježe Buharija, br. 3342., i ovo je njegova verzija, i Muslim, br. 163.

će u njemu biti i nikada neće umrijeti, njihova odjeća se neće habati niti će njihova mladost prolaziti.²²

Ebu Se'id prenosi da je Ibn Sajjad pitao Poslanika, sallallahu alejhi ve sellem, o džennetskoj zemlji, pa mu je Poslanik, odgovorio: „**Ona je kao fino bijelo prečišćeno brašno, koje miriše čistim miskom.**“²³

Svojstva džennetskih šatora

Uzvišeni Allah kaže: *...hurija u šatorima skrivenih.* (Er-Rahman, 72.)

Abdullah b. Kajs prenosi da je Poslanik, sallallahu alejhi ve sellem, kazao: „**Vjernik će u Džennetu imati šator od bisera izdubljenih, čija će dužina biti šezdeset milja. U svakom njegovom dijelu vjernik će imati suprugu koje će posjećivati i nijedna od njih neće vidjeti drugu.**“²⁴

Džennetski trgovi

Enes b. Malik prenosi da je Poslanik, sallallahu alejhi ve sellem, kazao: „**U Džennetu imaju tržnice na kojima će se džennetlije svakog petka iskupljati. Nakon što se okupe na tržnicama, zapuhat će vjetar**

²² Hadis je ispravan, a bilježe ga Tirmizi, br. 2526., i ovo je njegova verzija, i Darimi, br. 2717.

²³ Bilježi Muslim, br. 2928.

²⁴ Bilježe Buharija, br. 4879., i Muslim, br. 2838., i ovo je njegova verzija.

koji će oni osjetiti na svojim licima i odjeći, a nakon kojeg će se povećati njihova ljepota. Kad se vrate svojim suprugama one će im reći: 'Tako nam Allaha, vraćate se ljepši nego što ste otišli!' Oni će im odgovoriti: 'I mi smo vas zatekli ljepše nego što smo vas ostavili.'²⁵

Džennetski dvorci

Allah Uzvišeni je unutar nastamba i dvoraca Dženneta stvorio sve ono čemu ljudske duše teže i što njihovim očima predstavlja ljepotu.

Uzvišeni Allah kaže: *Allah obećava vjernicima i vjernicama džennetske bašče kroz koje rijeke teku, u kojima će vječno boraviti, i divne dvorove u vrtovima edenskim. A i malo naklonosti Allahove veće je od svega toga; to će, doista, uspjeh veliki biti!* (Et-Tevbe, 72.)

Raznolikost u položajima stanovnika džennetskih dvoraca

Allah Uzvišeni veli: *I kud od pogledaš, vidjećeš udobnost i carstvo prostrano.* (El-Insan, 20.)

Ebu Se'id El-Hudri prenosi da je Poslanik, sallallahu alejhi ve sellem, kazao: „Stanovnici Dženneta će gledati stanovnike soba koji će biti iznad njih, kao što vi gledate sjajnu zvijezdu na nebu, na istoku ili na

²⁵ Bilježi Muslim, br. 2833.

zapadu, a sve zbog prednosti koju će imati jedni nad drugima.“ Upitali su: 'Allahov Poslaniče, zar to nisu stepeni Allahovih poslanika koje niko od ljudi ne može dostići?' Odgovorio je: 'Ne! Tako mi Onoga u čijoj ruci je moja duša, to su stepeni ljudi koji su iskreno vjerovali u Allaha i koji su povjerovali u poslanstvo Allahovih poslanika.'²⁶

Opis džennetskih odaja u kojima će stanovati džennetlije

Opisujući džennetske odaje, Uzvišeni Allah veli:

1. *One koji budu vjerovali i dobra djela činili smjestićemo u džennetske odaje, ispred kojih rijeke teku, u njima će vječno boraviti. Kako će divna biti nagrada onima koji su se trudili.* (El-Ankebut, 58.)

2. *A one koji se Gospodara svoga boje, čekaju odaje, sve jedne iznad drugih sagrađene, ispred kojih rijeke teku, - obećanje je Allahovo, a Allah neće obećanje prekršiti.* (Ez-Zumer, 20.)

Alija prenosi da je Poslanik, sallallahu alejhi ve sellem, kazao: „U Džennetu postoje odaje čija se unutrašnjost vidi iz vana, a vanjšina iznutra.“ Tada je ustao jedan beduin i upitao: 'A za koga su one pripremljene?' Poslanik, sallallahu alejhi ve sellem, odgovori: 'Za onoga ko govori samo dobro, ko

²⁶ Bilježe Buharija, br. 3256., i Muslim, br. 2831., i ovo je njegova verzija.

udjeljuje hranu siromasima, ko posti dobrovoljni post i ko klanja noćni namaz dok drugi ljudi spavaju.²⁷

Džennetska posteljina

Allah Uzvišeni veli:

1. *Odmaraće se na posteljama čije će postave od kadife biti.* (Er-Rahman, 54.)
2. *I na posteljama uzdignutim.* (El-Vaki'a, 34.)

Opis džennetskih jastuka i ćilima

Allah Uzvišeni kaže:

1. *I jastuci poređani, i ćilimi rašireni.* (El-Gašije, 15-16.)
2. *Oni će biti naslonjeni na uzglavlja zelena, prekrivena ćilimima čarobnim i prekrasnim.* (Er-Rahman, 76.)

Džennetski divani

O njima Uzvišeni Allah kaže:

1. *Dobri će, zaista, u nasladama boraviti, sa divana gledati.* (El-Mutaffifun, 22-23.)
2. *Naslonjeni na divanima, oni u njemu ni mraz ni žegu neće osjetiti.* (El-Insan, 13.)

²⁷ Hadis je dobar, a bilježe ga Ahmed, br. 1338., i Tirmizi, br. 1984.

3. *Stanovnici Dženneta uživaće toga dana u blagodatima veseli i radosni, oni i žene njihove biće u hladovini na ukrašenim divanima naslonjeni.* (Jasin, 55-56.)

Opis džennetskih kreveta (sjedaljke, divani)

O tome Uzvišeni Allah kaže:

1. *I Mi ćemo zlobu iz grudi njihovih istisnuti, oni će kao braća na divanima jedni prema drugima sjediti.* (El-Hidžr, 47.)

2. *Biće naslonjeni na divanima poređanim, a obradovaćemo ih hurijama džennetskim.* (Et-Tur, 20.)

3. *Na divanima izvezenim, jedni prema drugima na njima će naslonjeni biti.* (El-Vaki'a, 15-16.)

4. *U njemu su i divani skupocjeni.* (El-Gašije, 13.)

Opis džennetskih posuda

O njima Uzvišeni Allah kaže:

1. *Služiće ih vječno mladi mladići, sa čašama i ibricima i peharom punim pića iz izvora tekućeg.* (El-Vaki'a, 17-18.)

2. *Oni će biti služeni iz posuda i čaša od zlata, u njemu će biti sve što duše zažele i čime se oči naslađuju, i u njemu ćete vječno boraviti.* (Ez-Zuhruf, 71.)

3. Služiće ih iz srebrenih posuda i čaša prozirnih, prozirnih, od srebra, čiju će veličinu prema željama njihovim odrediti. (El-Insan, 15-17.)

Abdullah b. Kajs prenosi da je Poslanik, sallallahu alejhi ve sellem, kazao: „**Imaju dvije dženetske bašče u kojima će posuđe i sve drugo biti od srebra i dvije bašče u kojima će posuđe i sve drugo biti od zlata. Džennetlije će od gledanja svoga Gospodara razdvajati samo zastor Allahove Preuzvišenosti na Njegovom licu u Džennetu Adna.**“²⁸

Ukrasi džennetlija i njihova odjeća

Opisujući njihove ukrase, Allah Uzvišeni veli:

1. A one koji budu vjerovali i dobra djela činili - Allah će sigurno uvesti u džennetske bašče, kroz koje će rijeke teći, u njima će se narukvicama od zlata i biserom kititi, a odjeća će im svilena biti. (El-Hadždž, 23.)

2. U njima će se narukvicama od zlata kititi i u zelena odijela od dibe i kadife oblačiti, na divanima će u njima naslonjeni biti. Divne li nagrade i krasna li boravišta! (El-Kehf, 31.)

3. Na njima će biti odijela od tanke zelene svile, i od teške svile, nakićeni narukvicama od srebra, i daće im Gospodar njihov da piju čisto piće. To vam je nagrada; vaš trud je dostojan blagodarnosti! (El-Insan, 21-22.)

²⁸ Bilježe Buharija, br. 7444., i Muslim, br. 180.

Prvi koji će obući odjeću na Sudnjem danu

Ibn Abbas prenosi da je Poslanik, sallallahu alejhi ve sellem, kazao: „**Prvi od svih stvorenja koji će biti obučen je Ibrahim, Allahov prijatelj.**“²⁹

Osobine džennetske posluge

O njima Uzvišeni Allah kaže:

1. *Služiće ih vječno mladi mladići, sa čašama i ibricima i peharom punim pića iz izvora tekućeg.* (El-Vaki'a, 17-18.)

2. *Služiće ih vječno mlada posluga - da ih vidiš, pomislio bi da su biser prosuti.* (El-Insan, 19.)

3. *A služiće ih posluga njihova nalik na biser skriveni.* (Et-Tur, 24.)

Prva hrana koju će probati džennetlije

Enes b. Malik prenosi da je Poslanik, sallallahu alejhi ve sellem, upitan o prvoj hrani koja će biti ponuđena stanovnicima Dženneta, pa je odgovorio: „**Prva hrana koju će stanovnici Dženneta jesti, okrugli dio jetra od ribe (kita).**“³⁰

Sevban kaže: „**Bio sam kod Allahovog Poslanika, sallallahu alejhi ve sellem, kad mu dođe**

²⁹ Bilježi Buharija, br. 6526.

³⁰ Bilježi Buharija, br. 3329.

jedan jevrejski rabin i reče: 'Ko će prvi od ljudi na Sudnjem danu dobiti dopuštenje za polaganje računa?' Poslanik odgovori: 'Siromašni muhadžiri.' Jevrej reče: 'Kakav će dar dobiti kad uđu u Džennet?' Poslanik odgovori: 'Okrugli dio jetre od kita.' Jevrej upita: 'Šta će poslije toga ručati?' Poslanik reče: 'Bit će im zaklan bik iz Dženneta, koji se hranio džennetskim plodovima.' On upita: 'Šta će piti?' Poslanik reče: 'Sa izvora koji se zove Selsebil.'³¹

Opis džennetske hrane

Allah Uzvišeni kaže:

1. *Uđite u Džennet, vi i žene vaše, radosni! Oni će biti služeni iz posuda i čaša od zlata, u njemu će biti sve što duše zažele i čime se oči naslađuju, i u njemu ćete vječno boraviti.* (Ez-Zuhruf, 70-71.)

2. *Ovakav Džennet obećan je onima koji se budu Allaha bojali: vrtovi s rijekama, s plodovima kojih uvijek ima i s trajnom hladovinom.* (Er-R'ad, 35.)

3. *I voćem koje će sami birati, i mesom ptičijim kakvo budu željeli.* (El-Vaki'a, 20-21.)

4. *Jedite i pijte radosni, za ono što ste u danima minulim zaradili!.* (El-Hakka, 24.)

Ebu Se'id El-Hudri prenosi da je Poslanik, sallallahu alejhi ve sellem, kazao: „**Zemlja će toga Dana biti kao komad hljeba koju će Uzvišeni Gospodar**

³¹ Bilježi Muslim, br. 315.

okretati Svojom Rukom, kao što neko od vas okreće hljeb kada je na putovanju. To će biti za one koji se nastane u Džennetu.“ U ovome hadisu se spominje i jedan židov koji je došao kod Poslanika, sallallahu alejhi ve sellem. Kazao mu je: „**Hoćeš li da te obavijestim o tome šta će jesti sa hljebom? Reče: 'Hoću.' On odgovori: 'Meso bika i ribe (kit) čije će okrugli dio jetre moći da jede sedamdeset hiljada osoba.**“³²

Džabir prenosi da je Poslanik, sallallahu alejhi ve sellem, kazao: „**Zaista će stanovnici Dženneta jesti i piti, ali neće pljuvati, neće mokriti i obavljati veliku nuždu, i neće se osekiavati. A ashabi su upitali: 'A šta biva sa hranom?' On im odgovori: 'Bit će samo nešto poput podrigivanja (mirisa miska) i znoja koji će imati miris miska. Bit će nadahnuti da Allaha slave (tesbih) i da Mu zahvaljuju (tahmid) kao što su nadahnuti da dišu.**“³³

'Utbe b. Abdu-s-Sulemijj, veli: „**Sjedio sam kod Poslanika, sallallahu alejhi ve sellem, kada mu dođe jedan beduin i reče: 'Čuo sam te da spominješ jedno drvo, a ne znam da neko ovosvjetsko drvo ima više bodlji od tog kojeg spominješ (znači: bagrem).' Pa mu Poslanik, sallallahu alejhi ve sellem, veli: 'Allah će svaku bodlju na njemu zamjeniti nečim što će biti u**

³² Bilježe Buharija, br. 6520., i ovo je njegova verzija, i Muslim, br. 2792..

³³ Bilježi Muslim, br. 2835.

obliku jajeta na kojoj će biti sedamdeset potpuno različitih vrsta hrane.³⁴

Opis džennetskog pića

O džennetskom piću Uzvišeni veli:

1. *Čestiti će iz pehara piti kamforom začinjeno piće.* (El-Insan, 5.)

2. *U njemu će iz čaše piće đunbirom začinjeno piti.* (El-Insan, 17.)

3. *Daće im se pa će piće zapečaćeno piti, čiji će pečat mošus biti - i neka se za to natječu oni koji se hoće natjecati! - pomiješano sa vodom iz Tesnima će biti, sa izvora iz kojeg će Allahu bliski piti.* (El-Mufaffifun, 25-28.)

Ibn Omer prenosi da je Poslanik, sallallahu alejhi ve sellem, kazao: „**Kevser je rijeka u Džennetu čije su obale od zlata, korito od zrna bisera i safira, zemlja joj je mirisnija od mošusa, dok joj je voda slađa od meda i bjelja od snijega.**“³⁵

Opis džennetskog drveća i plodova:

O tome Uzvišeni u nekoliko ajeta veli:

³⁴ Hadis je ispravan, a bilježe ga Taberani u *El-Kebiru*, 7/130., i u *Musnedu-š-Šamijjin*, 1/282. Pogledaj: *Es-silsiletu-s-sahihatu*, br. 2734.

³⁵ Hadis je ispravan, a bilježe ga Tirmizi, br. 3361., i ovo je njegova verzija, i Ibn Madže, br. 4334.

1. *I blizu će im hladovina njegova biti, a plodovi njegovi će im na dohvat ruke stajati.* (El-Insan, 14.)

2. *Oni koji su se Allaha bojali biće među izvorima, u gustim baščama i među voćem koje budu željeli.* (El-Murselat, 41-42.)

3. *U kojima će se odmarati, i raznovrsno voće i piće tražiti.* (Sad, 51.)

4. *I gdje ima voća svakovrsnog.* (Muhammed, 15.)

5. *A onima koji su se Allaha bojali želje će se ostvariti: bašče i vinogradi.* (En-Naba, 31-32.)

6. *U njima će od svakog voća po dvije vrste biti. U njima će biti voća, i palmi – i nara.* (Er-Rahman, 52 i 68.)

7. *U njima će moći bezbjedno koju hoće vrstu voća tražiti.* (Ed-Duhan, 55.)

8. *A oni sretni – ko su sretni?! Biće među lotosovim drvećem bez bodlji, i među bananama plodovima nanizanim i u hladovini prostranoj, pored vode tekuće i usred voća svakovrsnog kojeg će uvijek imati i koje neće zabranjeno biti.* (El-Vaki'a, 27-33.)

9. *U Džennetu predivnom, čiji će plodovi na dohvat ruke biti. Jedite i pijte radosni, za ono što ste u danima minulim zaradili!* (El-Hakka, 22-24.)

Malik b. Sa'asa'ah prenosi hadis o mi'radžu, a u njemu između ostalog stoji: „**Zatim sam dignut do Sidretu-l-muntehaa i ugledao sam njegove plodove u obliku zemljanih vrčeva iz jemenskog grada Hadžer, dok su joj listovi bili kao slonove uši. U njenom**

središtu su četiri rijeke: dvije skrivene, a dvije vidljive. Upitao sam: 'Šta je ovo, Džibrile?' Odgovorio je: 'Što se tiče skrivenih - to su dvije rijeke u Džennetu, a što se tiče vidljivih - to su Nil i Eufrat.'³⁶

Ebu Se'id prenosi da je Poslanik, sallallahu alejhi ve sellem, kazao: „U Džennetu ima drvo u čijoj hladovini putuje brzi konjanik sto godina bez prekida.“³⁷

Ebu Hurejre prenosi da je Poslanik, sallallahu alejhi ve sellem, kazao: „Stablo svakog drveta u Džennetu je od zlata.“³⁸

Opis džennetskih rijeka

Opisujući džennetske rijeke, Uzvišeni veli:

1. *A one koji budu vjerovali i dobra djela činili čekaju bašče džennetske kroz koje rijeke teku, a to će veliki uspjeh biti.* (El-Burudž, 11.)

2. *Zar je Džennet, koji je obećan onima koji se Allaha boje - u kome su rijeke od vode neustajale i rijeke od mlijeka nepromijenjena ukusa, i rijeke od vina, prijatna onima koji piju, i rijeke od meda procijedenog i gdje ima voća svakovrsnog i oprosta od Gospodara njihova.* (Muhammed, 15.)

³⁶ Bilježe Buharija, br. 3207., i ovo je njegova verzija, i Muslim, br. 162.

³⁷ Bilježe Buharija, br. 6553., i ovo je njegova verzija, i Muslim, br. 2828.

³⁸ Hadis je ispravan, a bilježi ga Tirmizi, br. 2525.

3. *Oni koji su se Allaha bojali biće u džennetskim baščama i pored rijeke na mjestu u kome će biti zadovoljni, kod Vladara Svemoćnoga.* (El-Kamer, 54-55.)

Enes b. Malik prenosi da je Poslanik, sallallahu alejhi ve sellem, kazao: „**Šetao sam Džennetom kad prođoh pored rijeke čije su obale kao kupole od šupljeg bisera. Upitao sam Džibrila: 'Šta je ovo?' Odgovorio je: 'Ovo je Kevser kojeg ti je Allah podario.' Njegov miris ili njegova zemlja je od mošusa.**“³⁹

Ebu Hurejre prenosi da je Poslanik, sallallahu alejhi ve sellem, kazao: „**Sejhan, Džežhan, Euftrat i Nil su rijeke u Džennetu.**“⁴⁰

Opis džennetskih izvora

Allah Uzvišeni veli:

1. *Oni koji su se Allaha bojali i onog što im je zabranjeno klonili, oni će u džennetskim baščama pored izvora biti.* (El-Hidžr, 45.)

2. *Čestiti će iz pehara piti kamforom začinjeno piće sa izvora iz kojeg će samo Allahovi šticećnici piti, i koji će kuda hoće bez muke razvoditi.* (El-Insan, 4-5.)

3. *Pomiješano sa vodom iz Tesnima će biti, sa izvora iz kojeg će Allahu bliski piti.* (El-Mutaffifun, 27-28.)

³⁹ Bilježi Buharija, br. 6581.

⁴⁰ Bilježi Muslim, br. 2839.

4. *U kojima će biti dva izvora koja će teći. Sa izvorima koji prskaju.* (Er-Rahman, 50 i 66.)

5. *U njemu će iz čaše piće inbirom začinjeno piti sa izvora u Džennetu, koji će se Selsebil zvati.* (El-Insan, 17-18.)

Opis džennetskih žena

Allah Uzvišeni kaže:

1. *Oni koji se budu Allaha bojali i grijeha klonili imaće u Gospodara svoga džennetske bašče, kroz koje rijeke teku, u njima će vječno boraviti, i čiste žene, i Allahovu naklonost – a Allah poznaje robove Svoje.* (Alu Imran, 15.)

2. *I posebne žene. Stvaranjem novim Mi ćemo hurije stvoriti i djevicama ih učiniti milim muževima njihovim, i godina istih za one sretne; biće ih mnogo od naroda drevnih, a mnogo i od kasnijih.* (El-Vaki'a, 34-40.)

3. *Pored njih će biti one koje će preda se gledati, očiju prekrasnih, kao da su one jaja pokrivena.* (Es-Safat, 48-49.)

4. *U njima će biti i hurije očiju krupnih, slične biseru u školjkama skrivenom, kao nagrada za ono što su činili.* (El-Vaki'a, 22-23.)

5. *U njima će biti one koje preda se gledaju, one koje, prije njih, ni čovjek ni džin nije dodirnuo – pa, koju blagodat Gospodara svoga poričete?! biće kao rubin i biser.* (Er-Rahman, 56-58.)

6. U njima će biti ljepotica naravi divnih - pa, koju blagodat Gospodara svoga poričete?! - hurija u šatorima skrivenih. (Er-Rahman, 70-72.)

Od Enesa b. Malika se prenosi da je Allahov Poslanik, sallallahu alejhi ve sellem, rekao: „**Odlazak u borbu na Allahovu putu ujutro i povratak iz nje naveče, bolji je od cijelog ovog svijeta i svega što je na njemu. Prostor u Džennetu koliko obuhvaća luk ili bič nekoga od vas, bolji je od cijelog ovog svijeta i svega što je na njemu. Kada bi se neka od džennetskih hurija pojavila na Zemlji, sve bi između Dženneta i Zemlje ispunila mirisom. Pokrivač na njenoj glavi vredniji je od cijelog ovog svijeta i svega što je na njemu.**“⁴¹

Od Ebu Hurejre se prenosi da je Vjerovjesnik, sallallahu alejhi ve sellem, rekao: „**Prva skupina koja će ući u Džennet je poput punog Mjeseca, a oni koji su odmah iza njih biće kao najsjajnija zvijezda na nebu. Svako će od njih imati po dvije žene, čija će se srž potkoljenica vidjeti kroz meso. U Džennetu neće biti neoženjenih.**“⁴²

⁴¹ Bilježe Buharija, br. 2796., i ovo je njegova verzija, i Muslim, br. 1880.

⁴² Bilježe Buharija, br. 3246., i Muslim, br. 2834., i ovo je njegova verzija

Džennetski miris

Ebu Hurejre prenosi da je Poslanik, sallallahu alejhi ve sellem, kazao: „**Prva skupina koja će ući u Džennet biće poput punog Mjeseca. Oni koji budu ulazili iza njih blistaće poput najsjajnije zvijezde na nebu. U njemu neće ni malu ni veliku nuždu obavljati, niti se useknjivati niti pljuvati. Češljevi će im biti od zlata, a znoj će im mirisati poput mošusa. Mengele će im biti od alojeva drveta. Žene će im biti djevice sjajnih očiju. Biće složni svi kao jedan i imaće lik njihova oca Adema, šezdeset aršina visokog od zemlje.**“⁴³

Abdullah b. Amr prenosi da je Poslanik, sallallahu alejhi ve sellem, kazao: „**Ko ubije nemuslimana koji sa muslimanima ima ugovor, neće osjetiti miris Dženneta, iako se njegov miris osjeća na daljini od četrdeset godina hoda.**“⁴⁴

U drugoj verziji stoji: „**Iako se njegov miris osjeća na daljini od sedamdeset godina.**“⁴⁵

⁴³ Bilježe Buharija, br. 3327., i ovo je njegova verzija, i Muslim, br. 2834.

⁴⁴ Bilježi Buharija, br. 3166.

⁴⁵ Hadis je ispravan, a bilježe ga Tirmizi, br. 1403., i Ibn Madže, br. 2687., od Ebu Hurejre.

Pjevanje džennetskih žena

Ibn Omer prenosi da je Poslanik, sallallahu alejhi ve sellem, kazao: „**Džennetske žene će pjevati svojim muževima najljepšim glasom koji niko nikada nije čuo. Neki od stihova koje će pjevati su: 'Mi smo ljepotice naravi divnih i supruge ljudi plementih koje će gledati očima radosnim.'** I pjevat će: 'Mi smo vječne i ne umiremo, mi smo sigurne i ne plašimo se i mi smo tu zauvijek i nigdje ne putujemo.’“⁴⁶

Intimni odnosi džennetlija

Allah Uzvišeni veli: Stanovnici Dženneta uživaće toga dana u blagodatima veseli i radosni, oni i žene njihove biće u hladovini na ukrašenim divanima naslonjeni. (Jasin, 55-56.)

Zejd b. Erkam prenosi da je Poslanik, sallallahu alejhi ve sellem, kazao: „**Jedan džennetlija će imati snagu za konzumiranje jela, pića i spolnog općenja kao stotinu ljudi. Jedan jevrej reče: 'Onaj ko jede i pije ima fiziološku potrebu.'** Poslanik odgovori: 'Tu potrebu će vršiti u vidu mirisnog znoja koji će izlaziti iz njihovog tijela.’“⁴⁷

⁴⁶ Hadis ispravan, a bilježe ga Taberani u djelu *El-Mu'džemu-l-Evsatu*, br. 4917. Pogledati: *Sahihu-l-džami'i*, br. 1561.

⁴⁷ Hadis je ispravan, a bilježe ga Taberani u djelu *El-Mu'džemu-l-Kebiru*, 5/178., i ovo je njegova verzija i Darimi, br. 2721.

Stalno uživanje džennetlija

Kada džennetlije uđu u Džennet, meleki će ih dočekati i obveseliti vječnim blagodatima za koje nikada prije nisu čuli.

Allah Uzvišeni veli: ***Ovakav Džennet obećan je onima koji se budu Allaha bojali: vrtovi s rijekama, s plodovima kojih uvijek ima i s trajnom hladovinom; to će biti nagrada onima koji se budu zla klonili, a nevjernicima će kazna vatra biti.*** (Er-R'ad, 35.)

Ebu Hurejre prenosi da je Poslanik, sallallahu alejhi ve sellem, kazao: „**Glasnik će povikati: 'Vječno ćete zdravi biti i nikada se nećete razboliti, vječno ćete živi biti i nikada neće umrijeti, vječno ćete mladi biti i nikada nećete ostariti, i vječno ćete uživati i nikada žalosni nećete biti. To su vam riječi Uzvišenog: *I njima će se doviknuti: Taj Džennet ste u nasljedstvo dobili za ono što ste činili.*'**“⁴⁸

Džabir veli: „**Upitan je Poslanik, sallallahu alejhi ve sellem: 'Da li će džennetlije spavati?'** Odgovorio je: **'Ne, jer je san veoma blizak smrti.'**“⁴⁹

Stepeni u Džennetu

Allah Uzvišeni veli:

⁴⁸ Bilježi Muslim, br. 2837.

⁴⁹ Hadis je ispravan, a bilježi ga Bezzar, *Kešfu-l-estari*, br. 3517.

1. *Gledaj kako jednima dajemo prednost nad drugima; a na onome svijetu razlika u stepenima i prednostima biće, doista, veća.* (El-Isra, 21.)

2. *A one koji pred Njega iziđu kao vjernici, a koji su dobra djela činili - njih sve čekaju visoki stepeni, edenski vrtovi kroz koje rijeke teku, u njima će oni vječno ostati, i to će biti nagrada za one koji se budu od grijeha očistili.* (Taha, 75-76.)

3. *I oni prvi - uvijek prvi! Oni će Allahu bliski biti u džennetskim baščama naslada - biće ih mnogo od naroda drevnih, a malo od kasnijih.* (El-Vaki'a, 10-14.)

Ebu Hurejre prenosi da je Poslanik, sallallahu alejhi ve sellem, kazao: „Allah se obavezao da će uvesti u Džennet svakog onog ko bude vjerovao u Allaha i Njegova Poslanika, obavljao namaz i postio ramazan, bez obzira da li se borio na Allahovom putu ili ostao u svome rodnom kraju. Neko je kazao: 'Hoćemo li to razglasiti ljudima, Allahov Poslaniče?' On reče: 'U Džennetu ima stotinu stepeni (derezha) koje je Allah pripremio za borce na Njegovom putu, a razdaljina između svakog stepena je koliko između nebesa i Zemlje. Kada Allaha molite za Džennet, onda Ga molite za Firdevs, jer je on središnji i najviši dio Dženneta, iznad kojeg je prijestolje Milostivog i iz kojeg izvire džennetske rijeke.'⁵⁰

⁵⁰ Bilježi Buharija, br. 2790.

Podizanje potomaka vjernika na više stepene čak iako nisu to zaslužili svojim djelima

Allah Uzvišeni veli: *Onima koji su vjerovali i za kojima su se djeca njihova u vjerovanju povela priključićemo djecu njihovu, a djela njihova nećemo nimalo umanjiti – svaki čovjek je odgovoran za ono što sam čini.* (Et-Tur, 21.)

Opis džennetske hladovine

Allah Uzvišeni veli:

1. *A one koji vjeruju i čine dobra djela uvešćemo, sigurno, u džennetske bašče, kroz koje će rijeke teći; u njima će vječno i zauvijek ostati, a u njima će čiste žene imati, i u debelu hladovinu ćemo ih uvesti.* (En-Nisa, 57.)

2. *A oni sretni - ko su sretni?! Biće među lotosovim drvećem bez bodlji, i među bananama plodovima nanizanim i u hladovini prostranoj.* (El-Vaki'a, 27-30)

3. *Naslonjeni na divanima, oni u njemu ni mraz ni žegu neće osjetiti, i blizu će im hladovina njegova biti, a plodovi njegovi će im na dohvat ruke stajati.* (El-Insan, 13-14.)

4. *Ovakav Džennet obećan je onima koji se budu Allaha bojali: vrtovi s rijekama, s plodovima kojih uvijek ima i s trajnom hladovinom; to će biti nagrada*

onima koji se budu zla klonili, a nevjernicima će kazna vatra biti. (Er-R'ad, 35.)

Visina i širina Dženneta

Allah Uzvišeni veli:

1. *Neka lica toga dana biće radosna, trudom svojim zadovoljna u Džennetu izvanrednome, u kome prazne besjede neće slušati.* (El-Gašije, 8-11.)

2. *I nastojte zaslužiti oprost Gospodara svoga i Džennet prostran kao nebesa i Zemlja, pripremljen za one koji se Allaha boje.* (Alu Imran, 133.)

3. *Nadmećite se da u Gospodara svoga zaslužite oprost i Džennet, prostran koliko su nebo i Zemlja prostrani, i pripremljen za one koji u Allaha i poslanike Njegove vjeruju. To je Allahova blagodat koju će dati onome kome On hoće; a u Allaha je blagodat velika.* (El-Hadid, 21.)

Najuzvišenije mjesto u Džennetu

Abdullah b. Amr El-As prenosi da je Poslanik, sallallahu alejhi ve sellem, rekao: „**Kada čujete mujezina, ponavljajte riječi za njim, zatim salavat na mene donesite, jer doista, ko na mene donese salavat, Allah na njega donese deset (salavata). Potom, molite za mene El-Vesile, to je posebno mjesto u Džennetu, koje neće biti dodijeljeno nikom drugom osim jednom Allahovom robu, pa se nadam da ću to biti ja. Pa ko**

za mene bude molio El-Vesile od Allaha, šefa'at za njega bit će mi dopušten!⁵¹

Najviši i najniži stepen u Džennetu

Mugire b. Šu'be prenosi da je Poslanik, sallallahu alejhi ve sellem, rekao: „**Musa, alejhi selam, je upitao Uzvišenog Allaha: 'Gospodaru, ko će imati najniži stepen u Džennetu?'** Allah mu je objavio: **'To je čovjek koji će doći pred Džennet nakon što sve džennetlije uđu u njega, pa će mu biti rečeno: 'Uđi u Džennet!' On će odgovoriti: 'Gospodaru, kako da uđem kad su svi ljudi ušli i zauzeli ono što im pripada?!'** Allah će mu onda reći: **'Jesi li zadovoljan da imaš u Džennetu onoliko koliko je imao jedan od dunjalučkih kraljeva?'** Odgovorit će: **'Jesam, Gospodaru!'** Onda će mu Allah reći: **'Tebi pripada još toliko i još toliko i još toliko i još toliko.'** Čovjek će reći: **'Zadovoljan sam, Gospodaru!'** Allah će mu opet reći: **'Tebi pripada deset puta toliko, ti ćeš u Džennetu imati sve što tvoje oko vidi i duša poželi.'** On će odgovoriti: **'Zadovoljan sam, Gospodaru!'** Nakon toga, Musa, alejhi selam, je upitao: **'A ko će onda imati najveći stepen u Džennetu?'** Uzvišeni Allah mu je objavio: **'To su oni kojima sam Ja nagradu Svojom rukom pripremio, a pripremio sam im ono što oko nije vidjelo niti uho čulo i što čovjeku ne može ni**

⁵¹ Bilježi Muslim, br. 384.

zamisliti.' Potvrda tome je u riječima Uzvišenog: *I niko ne zna kakve ih, kao nagrada za ono što su činili, skrivene radosti čekaju.*⁵²

U drugoj verziji u kojoj se spominje najniži stepen u Džennetu, stoji: „Tebi pripada čitav dunjaluk i još deset puta toliko.“⁵³

Najveća blagodat u Džennetu

Uzvišeni Allah kaže:

1. *Allah obećava vjernicima i vjericama džennetske bašče kroz koje rijeke teku, u kojima će vječno boraviti, i divne dvorove u vrtovima edenskim. A i malo naklonosti Allahove veće je od svega toga; to će, doista, uspjeh veliki biti!* (Et-Tevbe, 72.)

2. *Toga dana će neka lica blistava biti, u Gospodara svoga će gledati.* (El-Kijame, 22-23.)

Od Ebu Hurejre se prenosi da su neki ljudi upitali Poslanika, sallallahu alejhi ve sellem: „**Da li ćemo vidjeti na Sudnjem danu našeg Gospodara? Allahov Poslanik sallallahu alejhi ve sellem je tada upitao: 'Da li se vas nešto sprečava da vidite pun mjesec u vedroj noći?' Odgovorili su: 'Ne, Allahov Poslaniče.'** Poslanik opet upita: **'Da li vas nešto sprečava da vidite Sunce kada je nebo vedro.'** Odgovorili su: **'Ne, Allahov Poslaniče.'**

⁵²Bilježi Muslim, 189.

⁵³ Bilježe Buharija, br. 6571., i Muslim, br. 186., od Ibn Mes'uda.

On tada reče: 'Tako (jasno) će te vidjeti Allaha na Sudnjem danu.'⁵⁴

Suhejb prenosi da je Poslanik, sallallahu alejhi ve sellem, kazao: „**Kada džennetlije uđu u Džennet, Allah će ih upitati: 'Da li želite još nešto?' Oni će kazati: 'Zar nam nisi osvijetlio naša lica? Zar nas nisi uveo u Džennet i sačuvao Vatre?' Poslanik kaže: 'Tada će Allah ukloniti zastor i neće im biti darovano ništa draže i ljepše od gledanja u njihova Gospodara.'**“⁵⁵

Opis uživanja u Džennetu

Uzvišeni Allah kaže:

1. Oni koji su u ajete Naše vjerovali i poslušni bili - uđite u Džennet, vi i žene vaše, radosni! Oni će biti služeni iz posuda i čaša od zlata, u njemu će biti sve što duše zažele i čime se oči naslađuju, i u njemu ćete vječno boraviti. Eto, to je Džennet koji vam je darovan kao nagrada za ono što ste radili, u njemu ćete svakovrsnog voća imati od kojeg ćete neko jesti. (Ez-Zuhruf, 69-73.)

2. A oni koji su se Allaha bojali, oni će na sigurnu mjestu biti, usred bašči i izvora, u dibu i kadifu obučeni i jedni prema drugima. Eto, tako će biti i Mi ćemo ih hurijama, krupnih očiju, ženiti. U njima će moći bezbjedno koju hoće vrstu voća tražiti; u njima,

⁵⁴ Bilježe Buharija, br. 806., i Muslim, br. 182., i ovo je njegova verzija.

⁵⁵ Bilježi Muslim, br. 181.

poslije one prve smrti, smrt više neće okusiti i On će ih patnje u ognju sačuvati. (Ed-Duhan, 51-56.)

3. I Džennetom i svilom ih za ono što su trpjeli nagraditi: naslonjeni na divanima, oni u njemu ni mraz ni žegu neće osjetiti, i blizu će im hladovina njegova biti, a plodovi njegovi će im na dohvat ruke stajati. Služiće ih iz srebrenih posuda i čaša prozirnih, prozirnih, od srebra, čiju će veličinu prema željama njihovim odrediti. U njemu će iz čaše piće inbirom začinjeno piti sa izvora u Džennetu, koji će se Selsebil zvati. Služiće ih vječno mlada posluga - da ih vidiš, pomislio bi da su biser prosuti. I kud god pogledaš, vidjećeš udobnost i carstvo prostrano. Na njima će biti odijela od tanke zelene svile, i od teške svile, nakićeni narukvicama od srebra, i daće im Gospodar njihov da piju čisto piće. To vam je nagrada; vaš trud je dostojan blagodarnosti! (El-Insan, 12-22.)

4. I oni prvi - uvijek prvi! Oni će Allahu bliski biti u džennetskim baščama naslada - biće ih mnogo od naroda drevnih, a malo od kasnijih - na divanima izvezenim, jedni prema drugima na njima će naslonjeni biti; služiće ih vječno mladi mladići, sa čašama i ibricima i peharom punim pića iz izvora tekućeg - od koga ih glava neće boljeti i zbog kojeg neće pamet izgubiti - i voćem koje će sami birati, i mesom ptičijim kakvo budu željeli. U njima će biti i hurije očiju krupnih, slične biseru u školjkama skrivenom - kao nagrada za ono što su činili. U njima neće slušati prazne

besjede ni govor griješni, nego samo riječi: Mir, mir!
(El-Vaki'a, 10-26.)

5. A oni sretni - ko su sretni?! Biće među lotosovim drvećem bez bodlji, i među bananama plodovima nanizanim i u hladovini prostranoj, pored vode tekuće i usred voća svakovrsnog kojeg će uvijek imati i koje neće zabranjeno biti, i na posteljama uzdignutim. Stvaranjem novim Mi ćemo hurije stvoriti i djevicama ih učiniti milim muževima njihovim, i godina istih za one sretno; biće ih mnogo od naroda drevnih, a mnogo i od kasnijih. (El-Vaki'a, 27-40.)

Ebu Hurejre prenosi da je Poslanik, sallallahu alejhi ve sellem, kazao: „**Uzvišeni Allah veli: 'Pripremio sam Svojim dobrim robovima ono što oko nije vidjelo, uho nije čulo i ljudski um nije mogao zamisliti.'**“ Potvrda tome su riječi Allaha Uzvišenog: ***I niko ne zna kakve ih, kao nagrada za ono što su činili, skrivene radosti čekaju.***⁵⁶

Razgovor džennetlija

Allah Uzvišeni:

1. A oni koji su se Gospodara svoga bojali u povorkama će u Džennet biti povedeni, i kad do njega dođu – a kapije njegove već širom otvorene – čuvari njegovi će im reći: „Mir vama, od grijeha ste čisti, zato uđite u nj, u njemu ćete vječno boraviti!“ I oni će reći:

⁵⁶ Bilježe Buharija, br. 3244., i Muslim, br. 2824., i ovo je njegova verzija.

„Hvala Allahu, koji nam je obećanje Svoje ispunio i u Džennetu nam mjesto darovao, da se u njemu nastanimo gdje hoćemo! Divne li nagrade onima koji su se trudili!“ (Ez-Zumer, 73-74.)

2. One koji vjeruju i čine dobra djela Gospodar njihov će na Pravome putu podržati, zato što vjeruju; rijeke će teći ispred njih u džennetima zadovoljstva, molitva njihova biće u njima: „Slavljen neka si, Allahu!“, pozdrav njihov biće selam; a njihova posljednja molitva: „Tebe, Allaha, Gospodara svjetova, hvalimo!“ (Junus, 9-10.)

3. U njima neće slušati prazne besjede ni govor grijешni, nego samo riječi: „Selam, selam.“ (El-Vaki'a, 25-26.)

Džabir prenosi da je Poslanik, sallallahu alejhi ve sellem, kazao: „Zaista će stanovnici Dženneta jesti i piti, ali neće pljuvati, neće mokriti i obavljati veliku nuždu, i neće se usekati. A ashabi su upitali: 'A šta biva sa hranom?' On im odgovori: 'Izlučivat će se nečim poput podrigivanja i preko znoja, a znoj će imati miris miska. A sa svakim će uzdisajem Allaha slaviti i veličati.'⁵⁷

Riječi mira (selam) upućene od Gospodara džennetlijama

Allah Uzvišeni kaže:

⁵⁷ Bilježi Muslim, br. 2535.

1. *On vas blagosilja, a i meleki Njegovi, da bi vas iz tmina na svjetlo izveo - On je prema vjernicima samilostan - a na Dan kad oni pred Njega stanu, On će ih pozdravljati sa: Mir vama! - i On im je pripremio nagradu plemenitu.* (El-Ahzab, 43-44.)

2. *U njemu će imati voća, i ono što budu željeli. Mir vama! - biće riječi Gospodara Milostivog.* (Jasin, 57-58.)

Najbolji dar stanovnicima Dženneta

Ebu Se'id El-Hudri prenosi da je Poslanik, sallallahu alejhi ve sellem, kazao: „Allah će dozvati stanovnike Dženneta, a oni će odgovoriti: 'Odazivamo ti se Gospodaru, i svako dobro je u Tvojim ruci.' On će ih upitati: 'Da li ste zadovoljni?' Odgovoriće: 'Kako da ne budemo zadovoljni kada si nam dao ono što nikome od stvorenja nisi dao.' On će ih upitati: 'Zar ne želite da vam podarim nešto bolje od toga?' Upitaće: 'A šta je bolje od ovoga, Gospodaru naš?' On će reći: 'Moje zadovoljstvo vama i Ja se nikada na vas neću rasrditi.'⁵⁸

⁵⁸ Bilježe Buharija, br. 6549., i Muslim, br. 2829., i ovo je njegova verzija.

Koliko će iz ummeta Muhammeda, sallallahu alejhi ve sellem, biti u Džennetu?

Allah Uzvišeni je počastio ovaj ummet time da će ih činiti polovinom stanovnika Dženneta, i obećao im je i više toga, a to je da će činiti dvije trećine stanovnika Dženneta.

Abdullah b. Mes'ud veli: „**Bili smo sa Poslanikom, sallallahu alejhi ve sellem, u šatoru. Allahov Poslanik reče: 'Da li biste bili zadovoljni kada biste činili četvrtinu stanovnika Dženneta?' Odgovorili smo: 'Naravno.' Ponovo ih upita: 'A da li biste bili zadovoljni da činite trećinu stanovnika Dženneta?' Opet smo odgovorili: 'Naravno.' On reče: 'A da li biste bili zadovoljni da činite polovinu stanovnika Dženneta?' Opet smo isto odgovorili. A Poslanik reče: 'Ja se zaista nadam da ćete činiti polovinu stanovnika Dženneta. Samo će muslimani ući u Džennet, a vas će u odnosu na nevjernike biti kao jedna bijela dlaka na koži crnog bika, ili kao jedna crna dlaka na koži bijelog bika.**”⁵⁹

Burejde prenosi da je Poslanik, sallallahu alejhi ve sellem, kazao: „**Stanovnici Dženneta će biti poredani u stotinu i dvadeset redova. Osamdeset redova će biti**

⁵⁹ Bilježe Buharija, br. 6528., i ovo je njegova verzija, i Muslim, br. 221.

moji sljedbenici dok će četrdeset biti sljedbenici ostalih vjerovjesnika.⁶⁰

Osobine onih koji će ući u Džennet

Uzvišeni Allah veli: *A oni koji budu vjerovali i dobra djela činili – oni će stanovnici Dženneta biti i u njemu će vječno boraviti.* (El-Bekare, 82.)

Ijad b. Himar prenosi da je Poslanik, sallallahu alejhi ve sellem, kazao: „**Tri vrste ljudi će u Džennet: pravedan vladar koji ljudima čini dobro i kome su otvoreni putevi dobročinstva, samilostan čovjek nježnog i otvorenog srca prema svim muslimanima, a prema rodbini posebno i onaj ko se kloni zabranjenog, ne traži od ljudi, nego se uzda u Vladara Uzvišenog u svim svojim poslovima i pitanjima vezanim za porodicu.**“⁶¹

Harise b. Vehb prenosi da je Poslanik upitao: „**Hoćete li da vas obavijestim ko su stanovnici Dženneta?**“ Rekoše: 'Naravno.' Reče: 'To je svaki slabašni i nemoćni, koga svijet, zbog njegove nemoći ponižava, koji ako bi od Allaha nešto zamolio, On bi mu molbu uslišao.'“⁶²

⁶⁰ Hadis je ispravan, a bilježe ga Tirmizi, br. 2546., i ovo je njegova verzija, i Ibn Madže, br. 4289.

⁶¹ Bilježi Muslim, br. 2865.

⁶² Bilježe Buharija, br. 4918., i Muslim, br. 2853., i ovo je njegova verzija.

Čistoća prsa kod džennetlija

Allah veli: *Iz njihovih grudi ćemo zlobu odstraniti; ispred njih će rijeke teći, i oni će govoriti: Hvaljen neka je Allah, koji nas je na Pravi put uputio; mi ne bismo na Pravome putu bili da nas Allah nije uputio, poslanici Gospodara našeg su zaista istinu donosili, i njima će se doviknuti: Taj Džennet ste u nasljedstvo dobili za ono što ste činili!* (El-E'araf, 43.)

Ebu Se'id El-Hudri prenosi da je Poslanik, sallallahu alejhi ve sellem, kazao: „**Nakon što se vjernici spase vatre i pređu Sirat ćupriju biće zaustavljeni na mjestu koje se nalazi između Dženneta i Vatre, da bi izmirili račune jedni s drugima, i kada to riješe i očiste se od svega, biće im dozvoljeno da uđu u Džennet. Tako mi Onoga u čijoj je Ruci moja duša, biće im jasniji put ka njihovim nastambama u Džennetu nego što im je bio ka njihovim nastambama na dunjaluku.**“⁶³

Koga će biti najviše u Džennetu?

Imran b. Husajn prenosi da je Poslanik, sallallahu alejhi ve sellem, kazao: „Vidio sam Džennet i primjetio

⁶³ Bilježi Buharija, br. 6535.

sam da su u njemu većinom siromašni i vidio sam Vatru i primjetio sam da su u njoj većinom žene.“⁶⁴

Posljednji koji će ući u Džennet

Abdullah ibn Mesud prenosi da je Poslanik, sallallahu alejhi ve sellem, kazao: „**Posljedni koji će izaći iz Vatre je čovjek koji će puzajući posljednji ući u Džennet. Gospodar će mu kazati: 'Uđi u Džennet.' On će kazati: Džennet je popunjen.'** Gospodar će mu to ponoviti tri puta, a on svaki put odgovoriti: **'Džennet je ispunjen.'** Gospodar će tada kazati: **'Tebi u njemu pripada koliko dunjaluk i još deset puta toliko.'**“⁶⁵

Allahu naš, budi zadovoljan nama, našim roditeljima i svim muslimanima i Svojom nas milošću uvedi u džennetske vrtove, o Najplemenitiji, o Gospodaru svjetova!

⁶⁴ Bilježe Buharija, br. 3241., i ovo je njegova verzija., i Muslim, br. 2737.

⁶⁵ Bilježe Buharija, br. 7511., i ovo je njegova verzija., i Muslim, br. 186.